



KENYATAAN MEDIA
MENTERI DI JABATAN PERDANA MENTERI
(UNDANG-UNDANG DAN REFORMASI INSTITUSI)

PELUNCURAN INISIATIF PENGANTARAAN
KOMERSIAL PRO BONO AIAC

PUTRAJAYA, 14 MEI 2026 – Jemaah Menteri semalam telah dimaklumkan mengenai aspirasi nasional penubuhan Pusat Mediasi MADANI (PMM) bagi menyokong agenda Kerajaan MADANI dalam memperluas akses rakyat kepada sistem keadilan negara (*access to justice*) melalui mekanisme pengantaraan atau mediasi.

Bagi tujuan ini, PMM akan memainkan peranan penting dalam memperkasakan perkhidmatan pengantaraan di Malaysia secara bersasar dan holistik khususnya, dengan mempergiatkan usaha-usaha advokasi mengenai pengantaraan, memperkasakan kompetensi pengantara dalam negara, meningkatkan keyakinan rakyat terhadap mekanisme pengantaraan sekaligus menjalin kerjasama strategik bersama agensi-agensi dan institusi-institusi berkaitan secara inklusif.

Sehubungan dengan itu, selaras dengan aspirasi PMM ini, Inisiatif Pengantaraan Komersial Pro Bono AIAC akan dilancarkan pada 18 Mei 2026 sebagai satu lagi langkah penting yang turut menyokong hasrat Kerajaan MADANI dalam memperkukuh akses kepada keadilan yang lebih cepat, mudah diakses dan berkos efektif untuk rakyat.

Melalui pelaksanaan inisiatif ini, Pusat Timbang Tara Antarabangsa Asia (AIAC) akan menyediakan khidmat pengantaraan untuk menyelesaikan 26 jenis pertikaian komersial secara percuma bagi nilai tuntutan

RM250,000.00 dan ke bawah. Skop pertikaian komersial ini merangkumi, antara lain, perkhidmatan, pembekalan, jual beli, perdagangan dan pemasaran, hartanah, syarikat dan perkongsian, e-dagang dan ekonomi digital.

Bermula 18 Mei 2026, orang ramai boleh merujuk pertikaian komersial ini terus kepada AIAC atau dalam talian. Bagi menjayakan inisiatif tersebut, terdapat seramai 170 orang pengantara tempatan dan antarabangsa telah mengemukakan sokongan terhadap AIAC dan menyatakan kesediaan mereka untuk mengendalikan proses mediasi bagi pertikaian komersial secara percuma setakat ini. Pendekatan ini dijangka memberi manfaat penting khususnya kepada perusahaan kecil dan sederhana (PKS), golongan usahawan, dan penggiat industri termasuk industri kreatif serta rakyat yang berhadapan dengan pertikaian bernilai kecil.

Inisiatif ini merupakan manifestasi komitmen berterusan Kerajaan MADANI selaras dengan agenda reformasi institusi serta usaha meningkatkan kecekapan sistem keadilan negara demi kesejahteraan rakyat dan negara.

AZALINA OTHMAN SAID
MENTERI DI JABATAN PERDANA MENTERI
(UNDANG-UNDANG DAN REFORMASI INSTITUSI)
14 MEI 2026

